

# *FONG JESU A TLA*

2. . . le ko Leineng le legolo la Ngwana wa Gago yo o tloditsweng, Morena Jesu Keresete. Re Go lebogela Botshelo jwa Gagwe, le letlhogonolo la Gagwe le le tsholletsweng mo dipelong tsa rona, ka Mowa o o Boitshepo.

3. Fa fela re ne re tlaa ema, go bala ditshegofatso di le dintsitse re di neilweng, e tlaa bo e le mo go sa balegeng. Re lebogela botsogo jwa rona, le ka ntlha ya ditshegofatso tsotlhe tse dikgolo tse madi a neng a sa kgone go di reka. Wena ka letlotlo, ka letlhogonolo la Gago, o ne wa di naya mo go rona. Mme re batho ba ba nang le tshiamelo go Go itse.

4. Mme ke keletso ya dipelo tsa rona gore bao ba ba sa Go itseng, mme ba se botsalano le Wena, gore ba tle ba tlwaelane le Wena, mme maleo a bone a itshwarelwé, mme ba tsalane le Wena, Rara. Goné O ne wa re, “Nna ke pelonolo ebole ke ingotlile. Mme sefapaano se ne se le bonolo mme mekgweleo e ne e le motlhofo.” Mme re rapela fela gore O tlaa bonatsa seo mo go mongwe le mongwe ka bonosi bosigong jono. Fa go tlaa nna le ka sewelo bangwe fano ba ba sa Go itseng, mma ba tle bosigong jono mme ba Go amoge. Thusa Bakeresete jaaka ba tswelela. Segofatsa dipina tsena, bosigong jono, go tswa mo ba—bathong ba ba opelang.

5. Mme re thusé mo tsosolosong e e tlang. Masigo a matlhano ana, Morena, re ikutlwá gore moo e tlaa bo e le thato ya Gago, gore re tle re tshwaele masigo ana mo tirelong, fela pele ga re keteka tsogo e kgolo; le papolo, tsogo ya Morena wa rona.

6. Nna le rona jaanong. Tlaya ko Lefokong la Gago, Morena, mme o re direle, mme mma re nne le kabalanó tikologong ya Lefoko, ka Mowa wa Modimo. Ka Leina la ga Keresete re a rapela. Amen.

7. Ke tshiamelo e kalo go leka go ema fa pele ga motho a le mongwe, go bua ka ga Morena Jesu. Mme ke lemogile, mo bodireding jwa me, gone fela ga go tshwenye mo Modimong, a kana go na le ba le mmalwa, kgotsa go na le dikete. O na le Molaetsa o o tshwanang nako yotlhé wa batho, mo e leng letlhogonolo la Gagwe.

8. Serutwa sa rona bosigong jono, se simolola kwa morago ka nngwe ya ditiragalo tse dintle bogolo tsa Lekwalo. Ke akanya gore Lokwalo lotlhé le itekanetse fela. Ga go phoso epe e e ka fitlhelwang le Lefoko la Modimo. Lone fela le itekanetse. Fela, temana e re nang nayo e re e lebileng ka kelo tlhoko, ke nngwe ya ditemana tse di lemosegang tsa Lokwalo. Ke sengwe sa dikano tsa Bomesia jwa Gagwe.

<sup>8</sup> Lo a itse, batho ba kgona go tla mo lefatsheng lena, mme ba kgona go dira mehuta yotlhe ya dipolelo le mehuta yotlhe ya ditsholofetso, fela fa ba sa kgone go diragatsa ditsholofetso tseo, goreng, ditsholofetso tsa bone ga di dire molemo thata. Fela fa motho a tla mme a kgona go dira tsholofetso, mme fong a kgona go diragatsa tsholofetso eo, moo go dira gore lefoko la gagwe le siame.

<sup>9</sup> Mme O ne a le Motho a le nosi yo o kileng a tshela mo lefatsheng, yo o ka dirang polelo ena, “Ke na le thata ya go baya botshelo jwa Me faatshe, mme Ke na le thata ya go bo tsosa gape.”

<sup>10</sup> Ke nnile ka newa tshiamelo mo bodireding jwa me, go ema fa lebitleng la basimolodi ba le bantsi ba bagolo ba bodumedi, basimolodi ba bagolo jaaka Mohamete le ditumelo tse dintsitse di faphegileng tsa lefatshe. Fela bongwe le bongwe jwa tsone bo na le lefelo le le tshwailweng kwa mosimolodi wa tsone a suleng gone, mme a fitlhilwe, ebole o ntse foo go fitlheleng motlheng ono.

<sup>11</sup> Mme le jaana, mo tlholegong, ga ke ise ke nne le tshiamelo ya go ema fa phupung e e bulegileng eo kwa Keresete a neng a bewa gone, mme lebitla le ne le sa kgone go Mo tshwara. Gonno E ne e le Ene Yo neng a re, “Ke baya botshelo jwa Me faatshe; ga go motho yo o bo tsayang mo go Nna. Ke bo baya faatshe mme Ke bo tsosa gape.”

<sup>12</sup> Mme ke bodumedi bo le nosi mo lefatsheng jo bo ka rurifadiwang gore bo nepagetse, ke bodumedi jwa Bokeresete. Morena wa rona, ga A a ka fela a swela batho ba Gagwe, fela O ne a tsogela gape tshiamiso ya bone. Mme O tlhatlogetse kwa Godimo, bosigong jono, mme o dutse mo Teroneng ya Modimo. Mme Mowa wa Gagwe o tshela mo Kerekeng ya Gagwe, le batho ba Gagwe, o dira tsone dilo tse di tshwanang tse A di dirileng fa A ne a le fano mo lefatsheng; e tsweledisa bodiredi jwa Gagwe.

<sup>13</sup> Mme morago ga mosong ono, Mowa o o Boitshepo mo gontle thata o fologa mme o re kolobetsa ka bontle jwa Gagwe jo bogolo, ke ne fela ke tlhotlheleditswe go bua mafoko ao mme ke re, gore, letsatsi lengwe le le galalelang gore dineo tsotlhe tse di leng mo kerekeng di tlaa beelwa fela fa thoko, mo kobotlong, jaaka go ne go ntse. Mme Mowa o o Boitshepo, ka Sebele, o tlaa tsenya fela Kereke mo taalong e e kalo, ya lorato lwa Semodimo, go fitlhela balwetsi ba tlaa fodisiwa, difofu di tlaa bona, digole di tlaa tsamaya, ntleng ga go bewa diatla mo go bone. Go tlaa nna fela bokopano bo le bongwe jo bogolo.

<sup>14</sup> Mme erile re eme mosong ono, mo pakeng le nakong e re leng mo go yone, mme re bona monna yoo a tsamaya . . . kgotsa a kukilwe fano ka tlhogo ya gagwe e obegetse fa gare ga mangole a gagwe, mme ka seemo sa mokokotlo se se neng se mo obile jaana,

mme sa mo kokoropantse. Mme ya re a ntse foo, a simolola go thekumela kwa morago le kwa pele, ko morago koo.

<sup>15</sup> Fong go bona monna yoo a boa mme a dula faatshe, morago ga go tla ka mola wa thapelo, le go itse gore o dirile polelo, mme a rile, ka dingwaga di le dintsi, ene a neng a utlwela bothateng tota mo mo ditsebeng tsa gagwe, le go bona Morena Jesu a bula ditsebe tseo ka boitekanelo thata, go fitlhela a kgona go utlwa mo go ko tlase go feta thata ga go seba. A boela morago mme a nna faatshe a bo a baya diatla tsa gagwe mo ditsebeng tsa gagwe ebile a lela. Monna wa kgwebo; monna yo neng a kgweeditse makgolo a dimmaele go goroga fano.

<sup>16</sup> Fong, morago ga seo, fa seraleng, bopaki jwa bana bao ba tla fano, batho ba ba neng ba le mo seemong se se tlhoafetseng, sa mehuta yotlhe ya malwetsi, go tswa go kgabaganyeng lefatshe, ba ntsha bopaki jwa diemo tsa bone, le ka fa ba neng ba swa ka kankere le dilo tse di farologaneng. Mme bona ke bano, ba le ka fa tlwaelong, ba fodisitswe. Moo ke fela nngwe ya dithurifatso tsa Bomesia jwa Gagwe jo bo tswelelang.

<sup>17</sup> Ke thurifatso gore Bokeresete ke Boammaaruri. Ga go na bodumedi bope jo bongwe jo e leng Boammaaruri fa e se Bokeresete. Mme ke Boammaaruri. Keresete ke Boammaaruri. Mme Ena... Bodumedi jwa ga Keresete ga bo a swa le Keresete. Bo ka tswa bo ne jwa swa le Ena, fela bo ne jwa tsoga le Ena, le gone. Mme Ena, bosigong jono, o santse a netefatsa Bomesia jo bogolo jwa Gagwe.

<sup>18</sup> Re rutilwe, mo bukanyaneng nngwe e ke neng ke e bala nako nngwe e e fetileng, e bidiwa, *Kgosana ya Ntlo ya ga Dafita*. Ke a dumela e ne e kwadilwe ke monna yo o bidiwang Ingraham. Mme go gopolwa fa e le gore, bontlhabongwe jwa yone, ke mnene, mme e ntshitswe mo dikwalong dingwe tsa kgale, go tswa mo lekwalo la letlalo go tlogeng dingwageng di le dintsi, ntsi ko morago. Gore, go ne go na le Mojuta wa monana, ko Palestina, ka nako e e tshwanang e Jesu a neng a le koo. Mme ena, a neng a kwalela rraagwe ko Alexandria, o ne a atumalane le rraagwe thata, ka ga Johane Mokolobetsi le Jesu yo o neng a Ipitsa "Mesia." Mme teng moo o naya setshwantsho se se ntle sa thulaganyo ya rona bosigong jono.

<sup>19</sup> O ne a re Maretha le Marea le Lasaro e ne e le ditsala tsa khupamarama mo go Jesu. Gore, morago ga loso la ga Josefa, gore ba ne ba ya... O ne a tla go tshela le bone, le go nna le bone. Lasaro o ne a ithuta go nna mokwadi kwa tempeleng. Mme Maretha le Marea ba ne gape ba... Ba ne ba sena rra le mma. Jalo he, ba ne ba dira matselanyana a a logilweng a tempele, matselanyana le dilo, diaparo tse di logilweng, mme moo go ne ga ba naya sengwe se ba tshwanetseng go se dira. Mme Jesu ne a tla go nna le bone, pele ga A ne a ka ba a Ikitsise gore O ne a le Mesia.

<sup>20</sup> Mme Lasaro o ne a ntse a le golo ko nokeng, go utlwa thero ya ga Johane. Jalo he o ne a boa mme a ba bolelela se moporofeti yo mogolo a neng a tswile ko Galelea, go tswa ko bogareng ga naga, le se a neng a se bolela, gore go tla ga Mesia go ne go le gaufi. Mme Lasaro o ne a sa itse gore ena Yo neng a bua le ena e ne e le Mesia, ka Sebele.

<sup>21</sup> Mme letsatsi lengwe o ne a patelela Jesu, jaaka go ne go ntse, go fologa le ene, go utlwa moporofeti yona a rera. Mme Johane, golo koo, a sa apara ka mafoko a matona a a kokomologileng; monna fela yo o tlwaelesegileng, a sa apara jaaka moperesiti yo mogolo.

<sup>22</sup> Gonne, Modimo ga a nne mo tseleng e re aparang ka yone. Modimo ga a kgathale mo gontsi thata ka ga gone, fa fela re apere mo go siameng ebile re lebega sentle. Ga o tshwanele gore o dire gore kholar ya gago e tlhanololwe, kgotsa o rwale sefapa tlhogo mo tlhogong ya gago. Modimo o batla gore o nne le pelo e e ikobileng, e e ineetseng. Seo ke se Modimo a se solo felang.

<sup>23</sup> Mme jaaka a ne a bona Jesu a tla le Johane, ko kolobetsong ya gagwe, Johane o ne a retologa a bo a leba, a bo a re, “Bonang Kwana ya Modimo e e tlosang maleo a lefatshe.”

<sup>24</sup> Mme erile Jesu a ne a kolobetswa ke Johane, ba re O ne a boela morago ko legaeng la ga Lasaro le Maretha. Mme jaaka A ne a nna koo, a ja fa lomating lwa bona, a robala mo malaong a bona koo ko Bethani. Mme letsatsi lengwe, Modimo o ne a bua le Jesu a bo a Mmolelela, “Ke batla O tlogele lefelo lena, mme o ye kwa Ke tlaa Go supegetsang gone.”

<sup>25</sup> Jaanong, re a itse gore Baebele ne ya re, mo go Moitshepi Johane 5:19, Jesu ne a re, “Ga ke dire sepe ntleng le fa Rara a Ntshupegetsa pele se ke tshwanetseng go se dira.”

<sup>26</sup> Mme jaanong Modimo o ne a tshwanela go Mo supegetsa, ka nako eo, se a tshwanetseng go se dira, kgotsa A ka bo le ka motlha ope a ne a sa tloga ko Bethani. Jalo he O ne a tswela ntle, go ka nna loeto lwa malatsi, kgotsa a le mabedi.

<sup>27</sup> Mme kgantele, Lasaro o ne a lwala, mme ba ne ba romela gore Jesu a tle. Fela, mo boemong jwa go tla, Jesu o ne fela a tlhokomologa pitso.

<sup>28</sup> Jaanong a gone go ne go sa tle go go dira gore o ikutlw seeng fa modisa phuthego a dirile seo? Go ne go tlaa go dira gore o ikutlw okare, “Sentle, ga a kgathale ka ga rona.”

<sup>29</sup> Fela, ao, fa fela o nne o tlaa ema motsotso, go gakologelwa sena, gore, “Dilo tsotlh di berekela molemong mmogo mo go bao ba ba ratang Modimo.” Ga go sepe mo lefatsheng se se ka fosegang, fa fela o le mo Modimong. “Dikgato tsa basiami di laolwa ke Morena.”

<sup>30</sup> Mme fong ba ne ba romela gape ka ntlha ya ga Jesu. Mme Ena, go lebega jalo, ne a tlhokomologa pitso ya bone mme ne fela

a tswelela gone kwa pele. Morago ga malatsi a le manê a sena go feta, O ne a re, “Tsala ya rona, Lasaro, o robetse, mme ka ntlha ya lona Ke itumetse gore Ke ne ke se koo.” Gonne, fa A ka bo a ne a le teng, ba ka bo ba ne ba lekile go Mo dira gore a dire sengwe se e neng e se thato ya Modimo.

<sup>31</sup> Ao, ka fa nka kgonang go ema fano motsotsotso! Ka fa e leng gore, makgetlo a le mantsi, ka maikaelelo a a molemo, batho ba leka go biletsha batho ko ntle ga thato ya Modimo. Motho o tshwanetse a itse pitsyo ya gagwe e e feletseng e sa belaelwe. O tshwanetse o itse se o se dirang, mme eseng fela ka tsela e e mafatshwa, kgotsa o letlelele madi a go kgarakgatshe go tloga lefelong go ya go le lengwe, kgotsa tumo e go dire. Go sa kgathalesege ka fa o tumileng ka gone, ka fa o humileng ka gone, o tshwanetse gore o tlhole pele o senka Modimo, go itse thulaganyo ya Gagwe le thato ya Gagwe.

<sup>32</sup> Jaanong, fa Lasaro a ne a lwala, go ne go lebega ekete go seeng gore O ne a sa tle go boela morago. Fela Jesu ne a re, “Ke itumetse gore Ke ne ke se koo.”

<sup>33</sup> Ka gore, ba ka bo ba ne ba Mo patelela, ba re, “Jaanong, goreng O sa tle golo ka *kwano*? Goreng O sa dire *sena*? Mme goreng O sa mo tsose? O tsositse ba bangwe.” Fela, Jesu o ne a itse mo go botoka. Jesu o ne a itse se thato ya ga Rara e neng e le sone.

<sup>34</sup> Mme, ao, a tshiamelo e e segofetseng e go leng yone, gore re kgona go itse thato ya ga Rara. Fa re tlaa senka Modimo, Modimo o tlaa itsise thato ya Gagwe.

<sup>35</sup> Go botoka ke itse gore ke ne ke le mo thatong ya Modimo, fa ke ne ke ise ke bue le motho yo mongwe, go na le go rerela batho ba le dikete di le lesome bosigo bongwe le bongwe, ko ntleng ga thato ya Modimo. Ke kampa ka itse thato ya Modimo. Ke dumela gore e ne e le Dafita yo neng a re, “Go botoka ke nne sesutlha maoto,” kwa . . . kgotsa sengwe, “kwa ntlong ya Morena wa me, go na le go nna mo ditanteng le bosula.”

<sup>36</sup> A tshiamelo, go batla lefelo la rona mme re nneng koo. Go sa kgathalesege ka fa diabolo a tshikinyang ka gone, se a se buang, le ka fa a sotlang ka gone, nna gone ka tlhamallo mo thatong ya Modimo.

<sup>37</sup> Lemogang, foo, fa Jesu a ne a re, “Jaanong, ena o—ena o sole.” Ba ne ba akanya gore o ne a robetse. O ne a re, “O sole. Mme ka ntlha ya lona, Ke itumetse gore Ke ne ke se koo. Fela Ke ya go mo tsosa.” Ijoo! E ne e se sepe se e leng, “Ke tlaa ya mme ke bone fa Nka kgonang; Ke tlaa ya mme ke leke.” Fela, “Ke tlaa ya mme ke mo tsose.” Gonne, O ne a itse, Modimo o ne a Mmontshitse ka ponatshegelo, gore Lasaro o ne a ile go tswa mo lebitleng leo. Mme e ne e se tiro epe ya go fopholetsa. Ao, fa Modimo a ne a tlaa . . .

<sup>38</sup> Nako nngwe le nngwe e Modimo a bontshang ponatshegelo ya se se ileng go diragala, go ile go nna totatota ka tsela eo, fa ponatshegelo e tswa kwa go Modimo. Go tshwanetse fela go nne jalo! Ka fa nka emang fano mo temaneng ya me, mme ke inole fela, dioura, ka ga ditiragalo tse ke di itseng.

<sup>39</sup> Ke ile kwa ditiragalong kwa ke tlaa akanyang gone, “Ao tlhe Modimo, ruri O tlaa go dira,” ke tswela fela ko ntle mme ke leka fela go leka tumelo ya me kgatlhanong le gone. Fela makgetlo a le mantsi ga go bereke.

<sup>40</sup> Fela fa Modimo a bontsha ponatshegelo, ijoo, go tshwanetse fela go diragale. Ga go kake ga palelwa. Mme ka gore O a go dira jaanong, ke netefatso e e sa palelweng gore O santse a le Mesia, gore Bomesia jwa Gagwe bo kaneletswe ka ditshupo le dikgakgamatsso tsa thurifatso ya Lefoko la Gagwe le le segofetseng.

<sup>41</sup> Mme fong go akanya, gore, Lasaro, fa a ne a lwala. Ga go ope yo o itseng se bolwetse bo leng sone go fitlhela o nnile le jone mo legaeng le e leng la gago. Mme ke tlhomamisitse gore mongwe le mongwe wa rona, bosigong jono, o kgona go utlwelana botlhoko le Maretha le Marea. Ka fa e leng gore motshetsi wa bone a le nosi yo ba neng ba na nae, mokaulengwe wa bone, ne a robetse a lwala mo bolaong. Mme kooteng dingaka di ne di mo tlhobogile. Re rutilwe gore o sule ka go tswa madi mo makgwafong, kooteng ka kgothholo e tona. Mme o sule ka seemo seo. Mme e ne e le fa a ne a lwala thata, mme ngaka e ne e mo tlhobogile, mme ka nako eo Jesu o ne a palelwa ke go tla ko tsaleng ya Gagwe.

<sup>42</sup> Jaanong, moo ka nnete e ne e le nako e e lefifi. A o ka gopola bahumagadi ba bannye ba babedi ba bantle bao ba romela gore Jesu a tle, mme Ena a ne a gana go go dira? Morago ga ba sena go tswa mo kerekeng mme ba latotse bodumedi jwa kgale jwa Othodokse, mme ba ikgaogantse mo bankaneng ba bangwe ba lefatshe; mme ka nako eo ba ne ba baya tshepo yotlhe ya bone mo Monneng yona, Keresete, Yo ba neng ba dumela go bo e le Mesia, Keresete; mme fong Ena a ba swabise!

<sup>43</sup> Ao, rotlhe re nnile le mohuta oo wa maitemogelo. Ke gakologelwa fa ke ne ke sokologa lantlha, ka fa e leng gore batho ba me ba ne ba akanya gore ke ne ke latlhegetswe ke monagano wa me. Sentle, ba ne ba re, “Fa o tshegetsa mohuta oo wa bodumedi, o tlaa bo o le mo kagong ya ditsenwa mo malatsing a le mmalwa.” O nnile le selo se se tshwanang, sa batho ba ba go tlaopang, le bankane ba gago ba re o monagano wa gago o khutlile go dira ka tsela e e itekanetseng ebile o itshwere ka tsela e e sa itekanelang. Fela fa fela tumelo ya gago e le mo go Keresete, sengwe le sengwe se tlaa felela se siame. O sekwa wa ba wa tshwenyega ka ga seo. Mme ke kgona go gakologelwa ka fa e leng gore batho . . .

<sup>44</sup> Ke ne ke tle ke kopane le tsala ya me ya mosimane, le basetsana ba banana ba ke neng ke etelana nabo, ke kopane nabo mo mmileng. Mme o ne a re, “Billy, o fetogile wa nna sebidikami se se boitshepo.” Ke ne ke sa kgathale, gonne ke ne ke itse gore sengwe se ne se diragetse, sengwe se diragetse.

<sup>45</sup> Mme, mo pelong ya me, ke ne ka go dumela go bo e le Mowa o o Boitshepo wa mmannete, wa popota. Dingwaga di le masome a mabedi le bonê di fetile, mme gone fela go itsetsepse foo bosigong jono. Ke na le boikaelelo jo bo tshwanang go Mo direla, jaaka ke dirile bosigo jwa ntlha jo ke Mo soloeditseng, mo ntlwaneng eo ya kgale ya dikgong. Go tlhomame. Sengwe se ne sa tshwarelala! Dioura tse di lefifi di tsile. Masetlapelo a tsile. Maswabi a tsile. Loso le tsile. Fela, mo pele ga gone gotlhe, ke ikhutsa mo tsholofelong e ntle eo e A rileng, “Nna ke tsogo le Botshelo; yo o dumelang mo go Nna, le fa a ne a sule, le fa go ntse jalo o tlaa tshela.”

Tumelo ya me ga e a agiwa mo go sepe se se ko tlase

Ga Madi le tshiamo ya ga Jesu;

Fa gotlhe go dikologa mowa wa me wa botho go ineela,

Fong Ene ke tsholofelo yotlhe ya me le bonno.

Mo go Keresete, Lefika le le kwenneng, re eme;

Magato otlhe a mangwe ke motlhaba o o nwelang. (Go tlhomame!)

<sup>46</sup> Ao, e tshwanetse ya bo e ne e le nako e lefifi; fa ngaka ya bone e ne e ba swabisitse, fa tsala ya bone e ne e ba swabisitse, mme Lasaro jaanong o ne a swa. Mme letsatsi la bonê le ne la tla, mme o ne a dutla madi nako ya gagwe ya bofelo, mme o ne a ya go nna le Modimo. Ba ne ba mo ntsha; ba goga madi mo mmeleng wa gagwe, ba tsenya ditswaiso le lookwane la senkgamонate la spikenard mo ditshikeng tsa gagwe, ba mo phuthela ka letsela mme ba mmaya mo lebitleng. Mme o ne a nna foo, malatsi a le manê, a sule. Mmele wa gagwe o ne o nkga.

<sup>47</sup> Jaanong, mongwe le mongwe o a itse gore mmele wa motho o wela ditokitoking morago ga go ka nna dioura di le masome a supa le bobedi.

<sup>48</sup> Leo ke lebaka le Jesu a neng a tshwanela go tsoga pele ga malatsi a le mararo a ne a fetile. Mme dioura di le masome a supa le bobedi, tshenyego e a simolola.

<sup>49</sup> Mme Dafita, mo Baebeleng, ne a re, dingwaga di le makgolo a ferabobedi pele ga Keresete a tsalwa, fa tlase ga tlhotlheletso ya Mowa o o Boitshepo. Ne a re, “Ga Ke tle go lettelela Moitshepi wa Me go bona go bola, le eseng gore Ke tlaa tlogela mowa wa Gagwe wa botho ko diheleng.”

<sup>50</sup> Leo ke lebaka le A rileng, “Senyang mmele ona, mme Ke tlaa o tsosa mo teng ga malatsi a le mararo.” O ne a itse gore ga go

tshenyego epe e e neng e tlaa simologa. Ke sone se A suleng mo tshokologong ya Labotlhano, mme a tsoga gape mo mosong wa Sontaga, ke ka gore O ne a itse gore ga go sêlê e le nngwe ya mmele o o segofetseng oo e e neng e ka kgona go bola.

<sup>51</sup> Gonne, Lefoko la Modimo ke le le sa palelweng thata. Ijoo! O tshegetsa Lefoko la Gagwe, go fitlha kwa tlhakeng. “Ga A tle go letlelela Moitshepi wa Me go bona go bola, le eseng gore O tlaa tlogela mowa wa Gagwe wa botho ko diheleng.” Lefoko la Modimo le le sa palelweng le ne le ka se kgone go palelwa. Mmele wa Gagwe o ne o ntse foo.

Go tlhomame, batho ba a belaela. Ba ne ba re, “Malatsi le masigo a le mararo?”

<sup>52</sup> Fela, e ne e le mo teng ga malatsi le masigo a le mararo, O ne a rialo. O ne a itse gore go ne go ka se kgonege gotlhelele gore go nne malatsi le masigo a le mararo, ka gore tshenyego e ne e tlaa simolola.

<sup>53</sup> Jalo he, fano e ne e le Lasaro, malatsi a le manê a ne a fetile. Nko e ne e setse e wetse mo teng, mo sefatlhegong. Menwana e ne e setse e konegile. Diboko tsa letlalo di ne di simolotse go gagabela ka mo mmeleng wa gagwe mme di ja nama ya gagwe.

<sup>54</sup> Ao, e tshwanetse ya bo e ne e le oura e e lefifi go feta thata e lelwapanyana leo le kileng la e bona! Tsala ya bone e ile. Kereke ya bone; ba ne ba kgaotswe. Mokaulengwe wa bone o ne a sule. Mme batho ba ne ba sotla ebile ba ba tshega, jaaka basetsanyana bao ba babedi ba dutse ga mmogo mo legaeng, ka masire a bone a mantsho mo sefatlhegong sa bone, jaaka tlwaelo ya kwa botlhaba e ntse ka gone. Ba ntse foo, ba lela ebile ba lela, ka ga sehularo sa mokaulengwe wa bone. Bona ba ne ba le bao.

<sup>55</sup> Ga go ope fa e se yo o nnileng mo mohuteng oo wa legae; ga go ope fa e se bao ba ba nnileng fa thoko ga baratiwa ba bona! Re a itse, ba le bantsi ba lona lo a itse, ka fa re nnang ka gone fa moratweng wa rona. Roy, ke kgona go go bona o ntse fa thoko ga mosimanyana yoo. Mokaulengwe Roberson, ke kgona go go bona le Kgaitsadi Roberson lo ntse fa thoko ga mmaagwe. Ao, ka fa ba le bantsi ba lona! Ke kgona go ipona ke ntse fa thoko ga leseanyana la me, le le ileng, la go ka nna dikgwedi tse ferabobedi. Re itse se dilo tseo di leng sone. Ao, a dioura tse di lefifi!

<sup>56</sup> Fela e ne e le oura e e lefifi go feta thata e lelwapanyana leo le kileng la e bona. Mme go ka nna nako eo, Jesu o ne a tla mo tiragalong. Gone ke, ka tlwaelo, eo ke tsela e A go dirang ka yone. Ke mo oureng e e lefifi go feta thata, mme ka nako eo Jesu o tla mo tiragalong.

<sup>57</sup> E ne e le kgakala kwa tlase ko Babilone, moso mongwe, dingwaga di le dintsi tse di fetileng. Fa bana ba bararo ba Bahebereg, ba ba neng ba isitswe golo koo, ba le batshwarwa, ba le kgakala le lefatshe la gabon. Ba ne ba hutsafetse ka

gore ba ne ba le batshwarwa. Ba ne ba hutsafetse ka gore go ne go sena lefelo la go obamela. Fela ba ne ba santse ba tshela ka boammaaruri mo Modimong. Mme go ne ga tla segopa sa batsietsi mo tseleng, mme ba ne ba ntsha kitsiso ya molao, gore, “Le fa e le mang yo o sa tleng go obamela setshwantsho,” mo go neng go ganetsanya le bodumedi jwa bone, “o tlaa latlhelwa ka mo leubelong le le gotetseng.” Mme kgosi, ka tlhatlharuane ya gagwe e toná ya leratla, ne a tswa a bo a re, “Le fa e le mang yo o sa tleng go obamela setshwantsho sena, o tshwanetse a tsene mo leubelong le le gotetseng mme a fisiwe.” Jaanong, go ne ga nna le nako ya teko.

<sup>58</sup> Mme go tlhola go na le nako ya teko. “Morwa mongwe le mongwe yo o tlang mo Modimong, o tshwanetse pele a lekwe, a lekiwe.” Ao, ke a go rata. Ao, ga ke go bitse, fela, morago ga go sena go feta, go ungwa maungo a mantle a bopelonolo. Nako ya teko, fa molelo o le mogote! Ka fa Mokeresete mongwe le mongwe, go ralala dipaka, a neng a ralala nako eo ya teko. Mme Baebele ne ya re, “Fa re sa kgone go itshokela teko eo, re fetoga go nna maselwane, mme eseng bana ba Modimo.” Jalo he, ngwana wa mmatota mo nakong ya teko, mo e leng gore mona e ne e le yone, ga ba tsamaye ka pono. Matlho a bona a nama a tswaleletswe dilo tse di le fa tikologong ya bone. Ba tsamaya fela ka tumelo ya Morena Jesu Keresete, ba lebile ko Lefokong la Gagwe, mme ba dumela gore O tlaa tshegetsa Lefoko lengwe le lengwe totatota ka tsela e A rileng O tlaa go dira. Nako ya teko, diteko!

<sup>59</sup> Mme re a bona, fa nako ena ya teko e ne e tla ko baneng bana ba bararo ba Bahebere, ba ne ba netefatsa fa ba le boikanyego. Ba ne ba re, “Ga re tle go obamela setshwantsho.” Ijoo!

<sup>60</sup> Fong, kitsiso phatlalatsa e kgolo e e neng e saenilwe, ba ne ba tsamaya mme ba ba kokoanya ga mmogo, mme ba gogela mabogo a bone ko morago ga bone, mme ba ba tsamaisa mo lepolankeng le le tona, tselana, go wela ka mo leubelong le le neng le na le mawapi a le bohibidu jaaka ditlhaka di bolela, le le mogote ga supa go na le ka fa le kileng la ba la gotetswa ka gone. Mme ya re ba santse ba tsamaya mo polankeng ena, ba neng ba itse gore mo pelong ya bone, ba ne ba sa bone ka fa e leng gore Modimo le ka nako epe o ne a tlaa go dira ka gone. Fela ba ne ba itse gore Modimo o kgona go go dira. E ne e le tshiamelo ya bone go tsamaela ko losong lwa bone, jaaka go ne go ntse, go tshegetsa Lefoko la Modimo.

<sup>61</sup> Mme jaaka ba ne ba tsamaela golo koo, kooteng e ne e le oura e e lefifi go feta thata e ba kileng ba e bona. Ba ne ba sena—legae lepe go ya ko go lone, mo lefatsheng lena. E ne e le batshwarwa. Ba ne fela ba le jaaka makgoba. Ba ne ba ntshitswe mo lefatsheng la gabó bone. Ba ne ba sa lettlelwé go ya kobamelong ya morafe. Ba ne ba obamela medimo ya diseto mo lefatsheng leo; jalo he ba ne ba sa kgone go ya ko kobamelong ya medimo ya disetwa, ebile

ba ne ba sa kgone go nna le ditshiamelo tsa lefatshe la bone. Ba ne ba le batshwarwa. Fela, selo se le sengwe, o ka se kgone go bofa modumedi go mo tlosa Modimong wa gagwe. Nnyaya, o ka se kgone.

<sup>62</sup> Mme mosong oo, jaaka ba ne ba tsamaela golo koo, ba itse gore ba ne ba eme ba le nosi le Modimo. Mme erile ba simolola go dira dikgato tsa bone, jaaka ba ne ba tlhatloga, kooteng, oura e e lefifi go feta thata e ba kileng ba tla kwa go yone. Mme mogote wa leubelo o ne wa simolola go hutswela ka mašetla ka mo sefatlhegong sa bona. Mme jaaka ba ne ba dira kgato ya bone ya bofelo ya sala sentle mo lefatsheng lena, go fologela ka mo leubelong le le gotetseng leo, ka nako eo Jesu o ne a tla gaufi fela ka nako eo. Mme O ne a fologela ka mo leubelong le le gotetseng leo, a goga mokolwane go tswa mo ditlhareng tse di nnang di talafetse go tswa Legodimong, mme O ne a hutswela molelo o tloge mo go bone.

<sup>63</sup> Go fitlhela, morago ga go ša, kooteng oura kgotsa go feta, kgosi e ne ya lapa gotlhe mme ya re, "Bulang, mme a re boneng se se diragetseng."

<sup>64</sup> Mme erile ba gogela tlase sethibo se segolo sa leubelo, mme sethibo sa setale se setona kgotsa sa kgotlho se ne sa wela faatshe, kgosi e ne ya leba mo teng. Mme o ne a re, "Ke ba le kae ba re neng ra ba tsenya teng foo?"

O ne a re, "Re tsentse ba le bararo."

<sup>65</sup> O ne a re, "Go na le ba le banê teng moo. Mme Mongwe wa bona o lebega jaaka Morwa Modimo."

<sup>66</sup> Go ka nna ga tla dinako tse di gotetseng, tse di lefifi, go ka nna ga tla dinako tsa diteko, fela Jesu o tlhola a le mo tiragalang fa fela re ka nna boammaaruri ebile re ikanyega.

<sup>67</sup> E ne e le mosadinyana nako nngwe, yo neng a dirisitse madi otlhe a gagwe, mo dingakeng. Mme o ne a rekisitse polasi, le setlhophha, kooteng. Mme tsotlhe tse a neng a na natso, o ne a di rekisitse; mme a di neile dingaka, go leka go fodisiwa. Ga go epe ya tsone e e neng ya kgona go mo direla molemo ope. Mme jaaka a ne a ntse a le nosi, mmelenyana wa gagwe o ne o koafetse, ka gore o ne a latlhegelwa ke madi ka dingwaga di le dintsi. Mme go ne go se sepe se se neng se lebega se ka kgona go mo thusa. Mme foo . . .

<sup>68</sup> O ne a utlwile. Lo a itse, "Tumelo e tla ka go utlwa, go utlwa Lefoko." O ne a utlwile gore kgakala ka kwa ko letlhakoreng le lengwe la Galelea, go ne go na le Moporofeti ka koo, Yo neng a fodisa balwetsi. Fela, o ne a sena madi go kgabaganya letšha. O ne a sa kgone go pagama mokoro, ka boene; o ne a le bokoa thata. Mme o ne a sa kgone go nna le madi ape go duela mongwe o sele, ka gore o ne a dirisitse gothle mo a neng a na nago, mo dingakeng, mme o ne a santse fela a le maswe jaaka a kile a nna ka gone.

<sup>69</sup> Moso mongwe, fa a ne a santse a dutse ko ntle, jaaka re tlaa akanya, mo mokatakong, ka menwananyana ya gagwe e e roromang, a leka go loga ga nnye ka lemao kgotsa go loga ka dimao tse pedi. Jaaka a ne a leba ko tlase koo, go ne go na le modumonyana o o neng o diragala golo fa letlhakoreng la lewatle. Mme mokoronyana o ne wa kgweeletsa ka mo medibonokeng, mme go ne ga diragala gore a lebe. Mme morago ga...

<sup>70</sup> O ne a dutse foo, a akanya, “Jaanong madi otlhe a me a ile. Ke tlaa dira eng mo go latelang? Re na le...kooteng re kobiwe mo lwapeng. Sekoloto se a beeleditseng ntlo ya gagwe mo go sone se ne se setse se tsere seo. Ga re na le e leng dijo tsa go ja, kgotsa sepe se sele. Mme ga ke kgone go bona thuso epe.” E ne kooteng e le oura e e lefifi go feta thata e a kileng a e bona.

<sup>71</sup> Mme go ka nna ka nako eo, mokoronyana o ne wa tsamaela mo teng, mme Jesu o ne a tla gaufi. Mosadi yo o fologela ko nokeng, ka mmelenyana wa gagwe, o o roromang.

<sup>72</sup> Mme gakologelwang fela, ka gore Jesu o a tla, diabolo mongwe le mongwe ko diheleng o tlaa leka go le kganelela kgakala le Ena. Go ntse jalo. O ka nna wa utlwa Molaetsa, fela diabolo o tlaa dula gone mo legetleng la gago, mme a re, “O seka wa reetsa. O seka wa reetsa. O seka wa reetsa.” Fela o seka wa mo dumela.

<sup>73</sup> O ne a re, “Le fa e le mang yo o ratang, a ka tla mme a nwe mo metsing a Botshelo, mahala.”

Lo seka lwa mo reetsa, gonne ena ke diabolo.

<sup>74</sup> Mme mosadi yo monnye o ne a goroga kwa Jesu a neng a tlhagelela gone, mme batho ba phuthegela fa go Ena, bahumanegi, le jalo jalo.

<sup>75</sup> Mme moperesiti ke yoo o ne a eme le botlhe ba—baeteledipele ba batona ba bodumedi jwa gagwe. Mme ba ne ba Mo tlaopa, ebile ba re, “Heela, Wena o Ena Yo o fodisang balwetsi, a o Ena? Sentle, re na le ba le bantsi ba ba lwalang. Mpe re Go bone o ba fodisa. Sentle, Wena o Ena Yo o tsosang baswi, a o Ena? Re na le mabitla a a tletseng golo fano. Mpe re Go bone o ba tsosa.”

<sup>76</sup> Ga a ise ebile a ba neele le e leng kelo tlhokonyana. O ne fela a tswelela a tsamaya. O ne a na le selo se le sengwe go se dira, seo e ne e le selo se Modimo a neng a se Mo supegeditse go se dira. Go sepe se se ko tlase kgotsa go se sepe se se fetang!

<sup>77</sup> Nako e Mokeresete a gorogang ko lefelong leo, kwa a tlaa bayang fa thoko mme a se reetse ditshebo tsotlhe le dilwana tse di buiwang, le go tswelela gotlhe; mme a nne le boikaelelo bo le bongwe, joo ke go dira thato ya Modimo, jo Modimo a go rometseng go bo dira, go tlaa nna le letsatsi le le farologaneng le kereke e e farologaneng.

<sup>78</sup> Ke yona o ne a tsamaela golo ko lesomong lena. Mme Jesu o ne a tsamaya go bapa, mo mosepeleng wa Gagwe o o bonya, o o tsepameng.

<sup>79</sup> Mme batho ba ne ba sianela kwa go Ena, ebile ba re, "A Wena o Moporofeti? A Wena o *sena*? A Wena o *sele*? E re, ga tweng ka ga go tla ka kwano le go ntirela sengwe? Mpe ke Go bone o dira motlholo. Re tlaa rata go Go bona o fetola metsi go nna moweine; nkgwana ke ena e tletse ka one. Ke tlaa rata go nna le mongwenyana. Ba re e ne e le moweine o o monate. Dira *sena* moweine. Mpe ke bone ka fa o utlwlang ka gone."

<sup>80</sup> Ga a ise ebile a tsholetse tlhogo ya Gagwe. O ne fela a tswelela a tsamaya. Moo go ntira gore ke Mo rate.

<sup>81</sup> Lo a itse, go tsaya batho ba bannyennyane ba ba seng botlhokwa gore ba tlhatlharuane le go ngangisana. Monna yo motona ga a nke a tsaya sepe se se ntseng jalo tsia. Bakeresete ga ba lemoge se lefatshe le se buang, fa ba batla go bua sengwe le sengwe se ba se batlang. Ba na le...Ba batona thata go lemoga dilo tse dinnyennyane tseo. Ba tswelela fela ba tsamaela pele, ba tswelela fela.

<sup>82</sup> Mosadi yo monnye o ne a akanya, "Jaanong, ke oura e le nosi e nka bang ka Mmona; tshono ya me ya bofelo. Tshono e le nosi e nkileng ka nna nayo. Mme ke dumela ka nnete, fa nka kgona fela go ama seaparo sa Monna yoo, ke tlaa siamisiwa." A tumelo! A nako!

<sup>83</sup> Mme, fano, jaaka lesomo le leka go mo kganelo kwa morago, o khubama ka mangole a gagwe, ka tsela nngwe, mme a gagaba go ralala lesomo lotlhe leo, go fitlhela a ne a amme seaparo sa Gagwe. Mme o ne a boela morago a bo a ema mo lesomong.

Jesu ne a retologa a bo a re, "Ke mang yo o Nkamileng?"

<sup>84</sup> Goreng, lesomo le ne la re, "Goreng, ga go ope yo o Go amileng." Mongwe le mongwe o ne a go itatola.

<sup>85</sup> Mme Petoro ne a Mo omanya. O ne a re, "Morena, mongwe le mongwe o ntse a ikgotlha ka Wena."

O ne a re, "Fela Ke a lemoga gore thata e dule mo go Nna."

<sup>86</sup> Mme O ne a leba mo tikologong go fitlhela A mmona. Mme O ne a re, "Tumelo ya gago e go bolokile."

<sup>87</sup> Oura ya gagwe e e lefifi go feta thata. Mme Baebele ne ya re, gore, "O ne a ikutlwa mo teng ga gagwe, gore go hubila...kelelo ya madi e ne e khutlile."

<sup>88</sup> A Morena Jesu yo o tshwanang o ne a se fano mosong ono? Ko monneng yo o dutseng foo, ka kankere e e keketseng, go fitlhela ena... Ngaka ne ya re, "A ka kgona fela go tshela lobakanyana." Mme jaaka a ne a feta fa aletareng, mo oureng e e lefifi go feta thata e a kileng a e bona, mme metsotso e le lesome le botlhano o ne a ema ko morago koo. Mme o ne a tshwanela go tla fano a bo

a re, "Maikutlo otlhe a a bokete a dule mo go nna." Oura e e lefifi go feta thata, ka nako eo Jesu o tla gaufi.

<sup>89</sup> Mokaulengwe Burns a ntse ka koo, fa . . . Molekanenyana wa gagwe yo o rategang a le ko Kgalalelong, bosigong jono. Ka fa go neng go ntse ka gone, o ne a robetse foo, mo kokelong fano mo Louisville, ka kankere mo lebeteng. Mme dingaka di ne di mo tlhoboga. Mme Mokaulengwe Wood le nna re ne re le golo ko se—sekgweng, re tsoma megwele. Mme re ne ra tsena, mme sengwe se ne sa mpatika go ya kwa Louisville. Goreng? Ga ke itse.

<sup>90</sup> Mme ke ne ka re, "Mokaulengwe Wood, kgweeletsa gone go dikologa kgogometso, ke ya ko go wa Sutcliff. Mme fa o boa go dikologa, o ka ntsaya." Ke ne ka leta mme ka leta. Ke ne ke sa kgone go mmona gope. Mme morago ga lobaka, ke ne ka mo lemoga a tsokela kgogometso e nngwe, mme a feta go bapa le mmila, a akanya gore Sutcliff e ne e le mmila o mongwe ko godimo. Fa monna yo a ka bo fela a ne a lebile, a ka bo a ne a bone gore wa Sutcliff o ne o seyo foo. Mme o berekisana le wa Sutcliff. O itse kwa lefelo le leng gone.

<sup>91</sup> Fela Kgaitsadi Burns yo monnye, yo o ikhuditseng le Modimo, bosigong jono, o ne a eme mo legaeng la gagwe; ne a tsaya setshwantshonyana seo se se nang le Moengele wa Morena mo godimo ga sone, mme a khubama fa pele ga sone a bo a re, "Ao tlhe Modimo, nthuse ke bone Mokaulengwe Branham ka ntlha ya monna wa me yo o rategang."

<sup>92</sup> Mme o fologela ko bogareng ga toropo go duela sekoloto sa motlakase, a sa itse kwa ke neng ke le gone mo lefatsheng lena le le atlhameng. Mme o ne a tla. Ke ne ka leta go feta halofo ya oura. Mme ke ne ka tswelela ke bona lori e feta kgogometso e nngwe. Ke ne ka re, "O timetse. Ke tshwanetse ke ye golo koo." Mme fela jaaka ke ne ke tsena mo kgogometsong, mme o ne a tla go tsoketsa kgogometso, gore nna ke tsene mo loring, mme go batlile fela e le ka nako eo, Kgaitsadi Burns o ne a tla fa kgogometsong.

<sup>93</sup> Mme foo, ka thapelo ya tumelo, Modimo o fodisitse monna wa gagwe. Mme ke yoo o dutse bosigong jono. E ne e le mo oureng e e lefifi go feta thata, ka nako eo Jesu o tla go bapa.

<sup>94</sup> Re akanya fela gore re timetse mme re tlogetswé. Mme fa o simolola go ikutlwā . . . Tswelela fela o tshwareletse. O tlaa bo a le teng. O seka wa lapisega.

<sup>95</sup> E ne e le oura e e lefifi go feta thata e Georgie Carter yo monnye a kileng a e bona, golo koo ko Milltown. O ne a le leloko la kereke e e neng e sa dumele mo phodisong ya Semodimo. Ba ne ba sotla le go tlaopa phodiso ya Semodimo. Mme foo mosadinyana yoo a ntse mo seemong seo. Mme Morena o ne a bua le nna golo fano mo bolaong, a bo a re, "Fologela ko Milltown." Ke ne ke ise ke utlwe ka ga lefelo le.

<sup>96</sup> Ke ne ka tla mo go sone serala sena, mme ke ne ka re, "Morena o nthomile ko lefelong le le bitswang Milltown. Go na le

kwanyana e e tshwaregileng gotlhelele mo ditlhatsaneng, mme e lelela thuso.” Ga go ope yo neng a itse kwa e neng e le gone.

<sup>97</sup> Mme Mokaulengwe George Wright, o ne a le fano mosong ono, ne a re, “Ke itse kwa go leng gone. Gone fela go fa tlase ga lefelo la me.” Ke ne ka fologa ka Matlhatsa a a latelang. Ke ne ka leba gongwe le gongwe, mme ka simolola bokopano mo kerekeng ya kgale ya Baptisti.

<sup>98</sup> Mme fong Rrê Hall o ne a nkogogela ka koo go rapelela mosetsanyana yona, mme ke ne ka mo rapelela. Batho ba gagwe ba ne ba tlogela ntlo. Ba ne ba sa batle sepe se se amanang le gone, ka gore kereke ya bone e ne e ba boleletse, “Batho bape,” ba ba tsenang ka mo bokopanong jwa me, “ba tlaa kgaolwa mo kerekeng.” Ke yoo o ne a rapame, dingwaga di le ferabongwe le dikgwedi di ferabobedi, a rapaletse ka mokwatla wa gagwe, a sa kgone le e leng go sutu. O ne a lela. O ne a rapetse. Go fitlhela, o ka tsamaya, go fitlheleng letsatsing lena, mme wa leba. Bolaonyana jwa gagwe jwa mopako, o ne a gotlhile pe—pente yotlh go tswa ko morago ga yone, a lelela ko Modimong, go dira sengwe. Mme le fa go ntse jalo, kereke ya gagwe e e tsididi, e e gwaletseng e e ithhokomolosang e ne e sa dumele mo phodisong ya Semodimo mme e ne e tlaa gana ope go tla go mo rapelela ka tsela eo.

<sup>99</sup> Koo rraagwe e ne e le motiakone, kgotsa sengwe, mo kerekeng. Mmaagwe le bone, dipilara tse ditona mo kerekeng. Mme foo ba ne ba ganwa; ditshepo tsotlh di ne di ile. Dingaka di ne tsa mo tlhoboga, dingwaga di le tlhano pele. O ne fela a le bokete jwa diponto di ka nna masome a mararo le bosupa; go se sepe fa e se masapo. Maotonyana a gagwe a ne a lebega jaaka ditlhokwa tsa lefeelo. Mme ke yoo o ne a rapame a sena sepe fa e se fela letlalo mo godimo ga lesapo.

<sup>100</sup> Letsatsi lengwe, ke ya golo koo... Mme mmaagwe o ne a siile; ntataagwe o ne a tlogile gae. Ba ne ba sena sepe se se amanang le segogotlo seo. Mme letsatsi lengwe, ne ka tsena go mo rapelela, ke ne ka re, “Mosetsanyana, a o tlaa eletsa go tsoga mme o kolobetswe ka Leina la Morena Jesu, go tlhatswetsa maleo a gago kgakala, mme wena o tle o mo Mo direle?”

<sup>101</sup> Ke ne ka tshwanela go atumela gaufi go utlwa se a se buileng. O ne a re, “Ke tlaa dira sengwe le sengwe.” Ke ne ka leba, go ntse mo go ya me... bolaong jwa gagwe, mme foo go ne go ntse bukanyana ya me, e bidiwa *Jesu Yo O Tshwanang Maabane, Gompieno, Le ka Bosaeng kae*. Ke ne ka mo rapelela, go ne ekete go ne go sa ka ga mo direla molemo ope.

<sup>102</sup> Dibeke di le pedi ke ne ka tshwara bokopano. Ke ne ka ya go kolobetsa kwa Totten Ford. Mme letsatsi leo bokopano bo ne bo fela, bosigong joo. Mme fa ke santse ke kolobetsa...

<sup>103</sup> Go ne go na le modiredi yo mongwe golo koo yo neng a tlaopa le go sotla tsone dikakanyo tsa kolobetso ya metsi, le go dirisa

Leina la Morena Jesu Keresete. O ne a re, “Fa ope wa batho ba me yo o dutseng fa tlase ga tante ena, a kile a nna gaufi le monna yo, tswaya fano jaanong. Ga ke batle sepe sa go dirisana le bone.” Mme Rrê Wright go ne ga diragala gore a bo a ntse foo, mme o ne a emeleta gone foo a bo a tswa. Mme lone Letsatsi la Tshipi le le latelang . . . Ga ke a ka ka bula molomo wa me ka bo ke bua lefoko ka ga monna yo.

<sup>104</sup> Mme ke ne ka ya golo koo, ko lefelong go nna . . . go kolobetsa golo koo ko Totten Ford. Mme erile ke tswela mo metsing, foo go ne go eme batho go tswa tsosolosong ya gagwe, ba eme mo matshitsching, go ntlaopa ke kolobetsa ka Leina la Morena Jesu. Mme erile ke tswela mo metsing, e ka nna ka nako eo Jesu o ne a tla go bapa.

<sup>105</sup> Fano go ne ga tla phuthego yotlhe ya gagwe, ba apere diaparo tsa bone tse di siameng, ba gobuela mo metsing ao a a loraga, ba goeletsa, “Modimo nkutlwelie botlhoko!” Mme ke ne ka kolobetsa mongwe le mongwe wa bone ka Leina la Jesu Keresete, gone foo mo khuting eo ya metsi.

<sup>106</sup> Ne ka tswelela go ya kwa go ya Mokaulengwe George. Mme Mokaulengwe George ne a re, “Mokaulengwe Branham, tswelela o tle mo dijong tsa maitseboa mo metsotsong e le mmalwa.”

<sup>107</sup> Ke ne ka re, “Ke tshwanetse ke rapele.” Ke ne ka ya golo ko sekgweng, mme ke ne ke sa kgone go rapela, fano le fale. Mme ka tshoganetso, erile go nna lefifi go batlile, ke ne ka leba, mme go ne go na le Lesedi le phatsima go fologa ka setlharenanya sa dogwood, mme ne la re, “Tthatloga ka dinao tsa gago, ka dinao tsa gago, mme o tsamayele ka tsela ya boora Carter.”

<sup>108</sup> Georgie yo monnye a rapame foo, a lela, mme a re, “Ao, mama, ke ile go tlogelwa kwa ntle. O ile go tloga gompieno, mme ga ke tle go tlhola ke kgona go mmona.” Mme moo e ne e le tirelo ya go tswalela, bosigo joo, ya tsosoloso e kgolo. O ne a le yoo, ka ditshupo tsotlhе di ile, ne go lebega jalo. Mme go batlile e le ka nako eo, Jesu ne a tla gaufi.

<sup>109</sup> Mme mosadinyana yoo a ntse foo, a le fela diponto di le masome a mararo le sengwe ka bokete. Fa ke ne ke tsena teng moo ke bo ke mmaya seatla, ke ne ka re, “Kgaitadi, Morena Jesu o bonetse kwa go nna kgantele, ka kwa ko letlhakoreng la thabana kwa. O rile ke tle kwano mme ke beye diatla tsa me mo go wena, gore o tle o fodisiwe.”

<sup>110</sup> Mmelenyana oo, o o maratswana o o neng o ise o tsoge mo bolaong ka dingwaga di le ferabongwe le dikgwedi tse ferabobedi . . . [Fa go sa theipiwang teng mo theiping—Mor.] . . . ne a ema ka dinao tsa gagwe mme a tabogela ko pianong, mme a simolola go tshameka:

Jesu, ntshole gaufi le mokgoro,  
 Gone go Motswedi o o rategang,  
 Mahala mo go botlhe, ke molatswana wa  
 phodiso  
 O o elelang go tswa thabeng ya Golegotha.

<sup>111</sup> E ne e le oura e e lefifi go feta thata e Georgie a kileng a e bona, ka nako eo Jesu o ne a tla gaufi.

<sup>112</sup> Leloko la phuthego kgolo ya puso Willie D. Upshaw, dingwaga di le masome a le marataro le borataro mo setilosekolonkothwaneng, a kgorometswa go tswa kwa ntlolehalahaleng ya phuthego, go ya lefelong morago ga lefelo. Ne a rapeletswe, makgetlo a le makgolo. O ne a le motlatsatautona wa Mokgatlho wa Baptisti ya ko borwa, Southern Baptist. Monna yo mogolo, monna yo o gakgamatsang, monna yo o ka bong a ne a le Tautona mo United States, ka 1926, fa a ka bo a ne a rekitse botsalwapele jwa gagwe. Fela, o ne a tlhoile whisiki. Mme o ne a ema mo theketheng ya kilelo, nako e phathi ya Mademokherate e ka bong e mo tlhophile. Ba ne ba rile ba tlaa dira, mme ba ka bo ba go dirile. Ka gore, a ka bo a kgonne go go dira motlhofo. O ne a ratiwa thata.

<sup>113</sup> Fela o ne a re, “Ga ke na go ananya botsalwapele jwa me, go nna Tautona ya lefatshe.” Haleluya! Modimo re neye banna ba ba jalo, mo White House ya rona fano. Ee, rra. O ne a tlaa nna jang ka nako eo jaaka segole? Mokwatla wa gagwe o ne wa robega, esale a ne a le dingwaga di le lesome le bosupa, mme o ne a le masome a ferabobedi le borataro.

<sup>114</sup> Mme bosigo bongwe, ka kwa, fa pele ga masome a dikete tsa batho, fa Roy Davis a ne a mo rometse golo koo. Mme o ne a mo tsenya mo teng mo setilosekolonkothwaneng, morago ga Roy a sena go mo rapelela, le makgolo a ba bangwe. Mme ke ne ke ise ke utlwé ka ga monna yo, mo botshelong jwa me. O ne a le yoo, a ntse ko morago koo, fela mo bokopanong jo bongwe. Ke ne ka tsamaela ko seraleng. Mme go ka nna nako eo, ke ne ka leba, mme ka bona mokoa wa tshwang, le mosimanyana a tshameka. Jaaka Mowa o o Boitshepo o ne wa simolola go senola, O ne wa mo supa mo gare ga bangwe mme wa mmolelela gore ke leloko la phuthego kgolo ya puso, le gore Jesu Keresete o mo siamisitse.

<sup>115</sup> Foo, ena, sekoa, dingwaga di le masome a le marataro le borataro mo setilosekolonkothwaneng, dingwaga di le masome a ferabobedi le borataro, oura e e lefifi go feta thata e a kileng a e bona. Ditshepo tsotlhé di ne di ile, ka ntlha ya phodiso ya gagwe. Ka nako eo Jesu o ne a tla gaufi. Mme monna yo, a neng a ntse a le mo setilosekolonkothwaneng dingwaga di le masome a le marataro le borataro, ne a emelela mme a tabogela ko seraleng, fa dingwageng di le masome a ferabobedi le borataro, mme a kgoma dinao tsa gagwe, a bo a tlolela ko godimo le ko tlase. Mme ne a ema mo bokopanong jwa ga Billy Graham mme a opela

*Ke Ikaegile Mo Mabogong A Bosakhutleng*, mo direpoding tsa White House. Oura e lefifi go feta thata, ka nako eo Jesu o ne a tla gaufi.

<sup>116</sup> E ne e le oura e lefifi go feta thata e Aborahame a e boneng, fa a ne a le dingwaga di le lekgolo, ka nako eo Jesu o ne a tla gaufi.

<sup>117</sup> Bosigo bongwe morago ga go rera lobaka lo lo leeple, O ne a tsamaisa barutwa ba Gagwe. Mme ba ne ba tsena mo sekepeng mme ba ne ba tswela gongwe ntleng ga Ena. Mme go ne go lebega ekete, gore, fa A ne a dira, ka nako eo sone se kwa ntle ka ko lewatleng, sekepenyana se ne se le jalo. Mme letsbutsubunyana le ne la tlhagelela. Mme diabolo ne a re, “Ke ba tlositse mo go Ena jaanong. Ke tlositse dibidikami tse di boitshepo tsena mo go Mong wa bone. Ke tlaa bona gore ke Molaetsa o le kae o ba tlaa o isang ko lefatsheng lotlh. Ke tlaa nwetsa mongwe le mongwe wa bone fa ntle fano.”

<sup>118</sup> Jalo he, go ne ga tla letsbutsubu le legolo. Diabolo ne a simolola go budula mohemo wa gagwe, mme letsbutsubu le ne la tthatloga. Mme sekepenyana se ne sa simolola go tlolela kwa godimo le tlase, *jaana*. Disaile di ne tsa robega. Dirapo di ne tsa robega. Sekepe se ne sa tlala ka metsi. Mme e ne e le nako e e lefifi go feta thata. Ga go pelaelo ba ne ba tshwarane go dikologa lotheka, mme ba lela. Ba ne ba akanya, “Ao, O ile kae? Ke eng se se Mo diragaletseng? Goreng re ne re sa lete mme ra Mo tsaya le rona? Goreng re ne re sa nne le Ena mo mokorong?”

<sup>119</sup> Mme makgetlo a le mantsi, o ka nna wa akanya selo se se tshwanang. Tsala ya me, o ka tswa o tsamaetse kwa thoko ntleng le Ena, fela, gakologelwa, O santse a go lebeletse. O itse gone kwa o leng gone. Go ka tswa go na le bothata mo lelwapeng la gago. Go ka tswa go na le bothata mo mmeleng wa gago. Le fa e ka nna eng se go leng sone, o sekwa tshwenyega. O beile matlho a Gagwe mo go wena. O go lebeletse.

<sup>120</sup> O ne a pagamela kwa godimo ga thaba. O ne a lebile ko ntle koo, mme O ne a bona boferefere bongwe le bongwe jo diabolo a neng a bo tshameka. Haleluya!

<sup>121</sup> Ga A a ka a palama fela, fela O ne a palama dithako tsa tshireletso tsa Golegotha; eseng fela ko Golegotha, fela le dithako tsa tshireletso tsa Kgalalelo. Mme O dutse bosigong jono, kwa Tlotlomalong. O lebile ko tlase mo lefatsheng. Ga go na le e leng le-lekhubunya le le ka kgonang go tla mo metsing ntleng le (Ena) ke ka tseselsetso ya Gagwe; lewatle ga le kake la sutu; letlhare ga le kake la sutu; nonyane ga e kake ya fofa. Ao, a go segofadiwe Leina la Morena!

<sup>122</sup> Ena o kwa godimo ga magosana otlhe le dithata. Lefatshe le ne la Mo direla leina le le kwa tlase go feta le le ka tlisiwang; Modimo o ne a Mo naya leina le le kwa godimo go feta le le ka

newang. Lefatshe le ne la Mmaya ko tlase jaaka ba ne ba kgona go Mmaya, mo lebitleng le le leofang; fela Modimo o ne a Mo tsosetsa ko Bogodimong jo bo ko godimodimo. O kwa godimo thata go fitlhela A tshwanela go leba fa tlase go bona Legodimo.

Leitlho la gagwe le mo thageng,  
Mme ke a itse O ntlhokometse.

<sup>123</sup> O ntlhokometse. O itse kakanyo nngwe le nngwe e e leng mo tlhaloganyong ya gago. O itse tiro nngwe le nngwe e o e dirang. O itse sengwe le sengwe ka ga wena. Go ntse jalo.

<sup>124</sup> Wa re, “Fela, ke kgelogile, Mokaulengwe Branham.” Moo ga go dire pharologanyo e nnyennyane. O itse fela totatota se o neng wa kgeloga ka sone. O itse fela totatota kwa o leng gone.

<sup>125</sup> Wa re, “Sentle, Mokaulengwe Branham, ke ne ka tloga ntleng ga Ena, le nna. Ke nnile le tshono, nako nngwe, go bua. Ke nnile le tshono, nako nngwe, go—go nna Mokeresete. Ke nnile le tshono. Moreri o dirile pitso, mme ke tshwanetse nka bo ke ile. Ke go lekile gangwe, fela ke ne ka palelwa. Ke dirile *sena, sele.*” Go sa kgathalesege se o se dirileng, O santse a beile leitlho la Gagwe mo go wena.

<sup>126</sup> Barutwa bao ba ne ba tsamaya ba sena le Ena. Mme oura e e lefifi go feta thata, fa diabolo yoo a ne a ba tlosa foo, kgakala le Bolengteng jwa Gagwe, o ne a simolola go tlhasela mo go bone.

<sup>127</sup> Gongwe seo ke se a se go dirang bosigong jono. A ka nna a go naya kankere. A ka nna a go naya *sena*. A ka nna a go naya *Sele*. A ka nna a go naya lelwapa le le thubegileng. A ka nna a go naya pelo e e utlwileng bothhoko. A ka nna a go naya matshwenyego. A ka nna a go naya tlhogo e e opang. Ga ke itse se a tlaa se dirang. Fela go na le selo se le sengwe se ke se itseng, gore Modimo o santse a beile leitlho la Gagwe mo go wena. Ena e ka tswa e le oura ya gago e e lefifi go feta thata. Ga ke itse; Modimo o a dira.

<sup>128</sup> Fela mo oureng eo e e lefifi go feta thata, fa ba ne fela ba le gaufi le go tloga ba nwela, ka nako eo Jesu o ne a tla a tsamaya, mo metsing, one otlhe fela a sa feretlhega. Makhubu a matona a ne fela a papanega mo pele ga Gagwe, jaaka A ne a tsamaela gaufi.

Petoro ne a re, “Morena, fa yoo e le Wena, mpitse ke tle ko go Wena.”

O ne a re, “Tlaya. Tsamaela golo kwano.”

<sup>129</sup> “Kopa, mme o tlaa amogela; senka, mme o tlaa bona; kokota mme o tlaa bulelwa. Gonne ntanteng ya mongwe le mongwe yo o kokotang, go tlaa bulwa; mongwe le mongwe yo o senkang, o tlaa bona.” Go thomame. O santse a lebeletse. Mme selo se se gakgamatsang ka ga gone, fa barutwa bao ba ne ba sena thuso ebole ba sena tshepo, mme erile Jesu a ne a tla ko go bone, e ne e le selo se le nosi se se neng se ka kgona go ba thusa, mme ba ne ba Mmoifa. Ba ne ba Mo tshaba.

<sup>130</sup> Mme ka re gompieno, tsala, gore fa ditshaba di paletswe, gore fa batho ba paletswe, fa merafe e paletswe, kwa kereke e paletsweng gone, kwa sengwe le sengwe se sele se paletsweng gone, go lebega ekete rona gotlhellele re ile. Mme gantsi nako nngwe le nngwe, oura nngwe le nngwe, o kgona go utlwa pokolelo, mme wena ga o na go kgona go fetsa pokolelo o tlaa bo o bone lefatshe lotlhe nyeleditswe. Go kgotla go le gongwe ga go tshuba dibomo go tlaa go dira. Moo ke gotlhe mo o tshwanetseng go go dira, go le gongwe fela. Ga ba tshwanele gore ba tloge ko Moscow. Ba kgona go nna gone foo mme ba latlhele e le nngwe mo Fourth Street, ko Louisville. Mme re ka kgona go nna gone fano mme re latlhele e le nngwe mo Moscow, le rona.

<sup>131</sup> Mme go ile go nna eng mogang dikepe tse ditona tsena di ntse ko ntle mo lewatleng jaana, ka dirokete tseo tse di lebisitsweng gone ntlheng ya metsemegolo eo? E le nngwe mo lethakoreng lena, e supilwe ntlheng ya tsela *ena*; e le nngwe mo lethakoreng lena, e supilwe ntlheng ya tsela *eo*. Wa ntlha yo o amang a kgotlhe, bana ba tlaa ama go ya ntlheng ya tsela eo.

<sup>132</sup> Go ile go diragala eng? Legae la gago le ile go go direla molemo ofeng ka nako eo? Madi a gago a ile go go direla molemo ofeng ka nako eo? Tsala ya gago ya mosimane e ile go go direla molemo ofeng, kgotsa mokapelo wa gago wa mosetsana a ileng go go direla? Ke molemo ofeng o sengwe se ileng go go direla one? Fa o sa lolama le Modimo, o ile, o etse nako le Bosakhutleng.

<sup>133</sup> Ena ke oura e e lefifi go feta thata e lefatshe lena le kileng la lebagana nayo esale kwa tshimologong ya nako. Ga go ise go nne le nako mo ditsong tsotlhe tsa lefatshe e e leng lefifi jaaka go ntse gone jaanong.

<sup>134</sup> Kankere e mo tshenyakakong. Akanya fela, gore... Ke utlwile polelo maloba, kitsiso morafe jaana, “Gore go tlaa nna le batho ba le bantsi ba ba swang mo Amerika ngwaga ona, ka ntlha ya go goga disekarete, ka se baka kankere, ba ba tlaa swang ngwaga ona mo Amerika, go na le ba ba neng ba bolawa mo dingwageng di le nnê tsa Ntwa ya kwa Korea.” Kankere e mo tshenyakakong.

<sup>135</sup> Malwetsi a a diragala, mme sengwe le sengwe se a diragala. Sente, ga re itse se re tshwanetseng go se solo fela. Dingaka ga di itse se di tshwanetseng go se bitsa malwetsi, jalo he ba re one ke megare. *Mogare* ke eng? Botsa ngaka. Ke sengwe se a sa itseng sepe ka ga sone, o bua fela a re, “Ke mogare.” Ke gotlhe mo go leng teng.

<sup>136</sup> Go na le dikhukhwanenyana tsa kgale le medemone e fofa e motho a iseng a utlwe ka ga yone pele. Sengwe le sengwe se mo tseleng. Sengwe le sengwe, re leka go se laola ka dilo tsa tlholego. Fela, fa re leka go dira sena, go tlhagoga e le sengwe se sele. Go ntse jalo. O naya motho phenisiline ka ntlha ya *sena*, e tlaa simolola sengwe se sele. O naya *sena*, gone ke... .

<sup>137</sup> Wena fela o tswile gotlhelele mo tseleng. Modimo o na le tsela, go botoka rona re tseneng mo go yone.

<sup>138</sup> Dikereke di paletswe. Mapresbitheriene a a palelwa. Mamethodisti a a palelwa. Mabaptisti a a palelwa. Mapentekoste a a palelwa. Pilgrim Holiness e a palelwa. Church of God e a palelwa. Rona, mongwe le mongwe, re paletswe. Go ntse jalo. Wena ga o kake wa re, “Nna ke Momethodisti,” mme wa itshwara o sereletsegile. O ka se kgone go re wena o Mobaptisti mme wa itshwara o sereletsegile; Methodisti, kgotsa Mopresbitheriene, le fa e ka nna eng se o ka tswang o le sone, kgotsa Mopentekoste. O ka se kgone go re wena o sereletsegile, eseng go nna leloko la kereke, ka gore kereke e paletswe mo go tlhomolang pelo.

<sup>139</sup> Bolwetse bo mo tshenyakakong e kalo go fitlhela, ke a dumela, botlhano go tswa mo boferabobeding, kgotsa sengwe se se jalo, ba tlaa swa ngwaga ona, go tswa mo kankereng. Akanya ka ga gone. Mme malwetsi a mehuta yotlhe, malwetsi a maša, le dilo di tlhagoga, moo go boitshega fela go akanya ka ga gone.

<sup>140</sup> Dikoloi di a bolaya. Mme letsatsi lengwe le lengwe, batho ba kgweetsa go fologa ka tsela ba le mafafa thata, ebole ba bokolela.

<sup>141</sup> Goreng, ke ne ke fologa ka mmila ko Louisville, maabane, mme mosadi o ne a ile go mfaphola mo mmileng. Ke ne ke tsamaya ke tswelela *jaana*, mme mosadi wa me o ne a na le nna, mme ke ne ka utlwā mongwe fa morago ga me. Le—lesomo le ne fela le... Mme mosadi mongwe yo o lebegang bomatla, ka go goga sekarete, o ne a re, “Sentle, jaanong, fa o sa itse gore ke letlhakore lefeng la mmila le o batlang go tsamaya mo go lone, tloga mo mmileng.”

Ke ne ka re, “Sentle, mohumagadi...”

O ne a re, “Didimala!” Ke wena yoo. Ke wena yoo.

<sup>142</sup> Gone ke eng? Ke ga go tsenwa ke tsebe tsebe. Ke mo go dirang mo tlhaloganyong. Mme dingaka di bolela gore ba le ferabongwe go tswa mo Maamerikeng mangwe le mangwe a le lesome a boga ka ga go se nonofe ga tlhaloganyo. Le e leng baitseanape ba tlhaloganyo, ba ba tshwanetseng ba bo ba le baphutholodi ba tlhaloganyo, ba nna ba ba sa laolesegeng ebole ba tsenwa. Ba ba bofa ka mefiri e metona, mo kagong ya ditsenwa.

<sup>143</sup> Botsenwa bo tloga lefelong le le lengwe go ya go le lengwe. Thubetso e tloga lefelong le le lengwe go ya go le lengwe. Whisiki e tloga lefelong le le lengwe go ya go le lengwe. Boleo bo tloga lefelong le le lengwe go ya go le lengwe. Ditogamaano di tloga lefelong le le lengwe go ya go le lengwe. Ga go na tsela ya go go emisa. Bokomonisi bo anamela mo teng ka bofeso jaaka morwalela. Ga go na tsela ya go go emisa, ka gore ba mo goromenteng le gongwe le gongwe go sele.

<sup>144</sup> Ao, fela, a Modimo a segofatswe! Fela mo oureng ena e e lefifi go feta thata, ka nako eo Jesu ke yona a tsena, ka seatla sa Gagwe

se se otlolotsweng, ebile a supegetsa ditshupo le dikgakgamatsso, ebile a naya batho pholoso le boutlwelo botlhoko. Oura e e lefifi go feta thata e lefatshe lena le kileng la e bona! Motlhhang, lefika la Gibraltar le tlaa phatlakanelo ditokitoking, letsatsi lengwe. Fela, Lefika la dipaka le tlaa ema ka bosafeleng, e le segopotso mo tsogong, Keresete.

<sup>145</sup> Modimo a le segofatseng batho! Modimo a le segofatseng, bana! O ka nna wa bo o humanegile. O ka nna wa se itse kwa boupi jo bo latelang bo tswang gone. Fela, go na le selo se le sengwe, wena fela o amogelesegile fa Motswedeng wa Botshelo bosigong jono, jaaka monna yo o humileng go feta thata mo lefatsheng. Wena o tle ntleng o sena tšheletse, ntleng ga tuelo. Go bulegetse le fa e le mang yo o ratang.

<sup>146</sup> Ke oura e e lefifi go feta thata e lelwapa le kileng la e bona. Lebelelang malwapa a thubegile. Go na le dithhalano tse dintsi mo Amerika, a le nosi, go na le tse di leng teng mo lefatsheng lotlhe le lengwe le kopantswe ga mmogo. Tlhalo mo tshenyakakong. Ke kae kwa boammaaruri le bo—boitshekero jwa pelo le bómma jwa basadi ba rona ba Maamerika bo ileng gone? Lebelelang banna, mme gotlhe mo ba go dirang ke lobelo mo ditseleng, ba leka go tlosa sengwe le sengwe mo tseleng ya bone, se ba kgonang, ba fologa, le go nwa bojalwa pele ga ba ya gae.

<sup>147</sup> Lebelelang basetsanyana ba rona ba banana ba fologa ka mmila, disekarete mo diatleng tsa bone. Mme jalo he go sa kgathalesege ka fa boranyane jwa tsa kalafi bo ntshetsang ntle tlhagiso ka gone, “Ke kankere! Ke kankere!” Ga ba kgathale. Ga ba kgathale. Ba tlaa di goga ba tswelela gone pele, le fa go ntse jalo.

<sup>148</sup> Moreri a ka ema mme a rere gore masedi a gagwe a motshegare a fele, mme a ba bolelele gore go phoso, mme ba tlaa re, “Ao, segogotlo ke wena sa kgale.” Lefatshe le ipaakanyeditse katlholo, mme re ile go e amogela. Tshwayang lefoko la me, ga go tle go nna mo go leele thata go fitlhela go nna le sengwe se se diragalang.

<sup>149</sup> Fa ke ne ke bona tsosoloso ena, e anama mo motsotsong. E ne ya tlolaganya. Mme ke eme foo, Naledi eo ya Moso e ne ya kalela mo nokeng, dingwaga di le masome a mabedi le sengwe tse di fetileng, fa A ne a re, “Molaetsa o tlaa anama ka bofeso le lefatshe.” Mme go nnile le tshologo ya segologolo, ya Pentekoste ya Mowa o o Boitshepo, mme melelo ya tsosoloso le ditirelo tsa phodiso di khurumeditse kgolokwe ya lefatshe.

<sup>150</sup> Ba dirile diphoso di le dintsi. Pego ya koranta fano, e se bogologolo, mo go McCrall, kgotsa, ya ga McCall, nako e monna yole a neng a tshoetsa bokopano jwa me golo koo ko Minneapolis, bangwe ba bone, Rrê Peterson le bone, ne ba tla ba mpolelela gore o ne a le mo bokopanong. Ke ne ka re, “Ga go pelaelo epe gotlhelele. Fela ga o ise o phuruphutse dikgannyanana

tsa gago sentle. O rile A. A. Allen o kwadile buka eo. Mme A. A. Allen o ne a sena sepe se se amanang le gone. Fong, fa moo e ne e le phoso e e kalo, ke dumela gore mo go setseng ga gone ke phoso e ntsi.” Ke ne ka re, “Ka nnene, bakaulengwe ba ka tswa ba tshwanelwa ke go nyadiwa go le gontsi. Ba dirile diphoso tse dintsi. Moo go siame. Fela, mokaulengwe, go botoka ke fitlhelwe mo botlhabanelong, ke dira diphoso, go na le go nna monyatsi wa monna yo o lekang go dira gore mewa ya botho e bolokelwe Modimo.” O dira eng ka ga gone?

<sup>151</sup> A go segofadiwe Leina la Morena Modimo! Thata ya Morena Jesu Keresete e lekanetse fela bosigong jono. Ke Lefika le le nosi. Ke tsholofelo e le nosi. Ke Tumelo e le nosi. Mme Keresete o E go neile.

<sup>152</sup> [Fa go sa theipiwang teng mo theiping—Mor.] . . . mme o tshele, kgotsa o hulare o bo o swa. Ke oura e e lefifi go feta thata e lefatshe le kileng la e bona. Fela Jesu o tsile gaufi, mme Ena o fano jaanong. Ditshegofatso tsa Gagwe di bulegile. Letlhakore la Gagwe le tlhabilwe. Diatla tsa Gagwe di otlolologile. “Mme le fa e le mang yo o ratang, a ka nna a tla mme a nwa mo metswedding ya Botshelo, mahala.” O dire maikgethelo a gago. Bogorogelo jwa gago jwa Bosakhutleng bo tlaa nna—bo tlaa nna fa diphatseng tsa maithsholo a gago mabapi le Jesu Keresete. Ena e ka tswa e le tshono ya gago ya bofelo.

<sup>153</sup> Mme fa re oba ditlhogo tsa rona jaanong fela ka ntlha ya lefoko la thapelo, ke tlaa kopa kgaitadi go tla mo pianong.

<sup>154</sup> Mme fa motho mongwe le mongwe a santse a le mo thapeleng, ke batla lo go akanyeng ka gone. O ka ya kae bosigong jono? Go tlaa diragala eng bosigong jono fa tlhaselo ya pelo e ne e tlaa go itaya? Ena e ka tswa e le tshono ya bofelo e o nang nayo. Akanya ka ga gone jaanong. Selo ke, a ga o tle go tsaya tshono ena?

<sup>155</sup> Wa re, “Sentle, nna ka mohuta mongwe ke monana.” Ao, mokaulengwe, kgaitadi, Ena ga a gobelele ka ntlha ya dingwaga. O ka kgabaganya mola fa o le monana kgotsa fa o godile; ga go kgathalesege. Lo a bona?

<sup>156</sup> Rraetsho wa Legodimo, Molaetsa ona jaanong re a o Go naya, ka Leina la ga Keresete. Ke oura e e lefifi go feta thata e lefatshe le e boneng. Ke nako e e lefifi go feta thata e ditso tsa motho di kileng tsa e kwala. Go na le dikonopa mo phefong, dipiring tse di fofang, ba di bitsa jalo.

<sup>157</sup> O ne wa re, “Go tlaa nna le ditshupo ko legodimong; mme mo lefatsheng, dithoromo tsa lefatshe tse ditona di tshikinyega mo mafelong a mefutafuta, diphadimogo tsa dikgwamolelo; makhubu a matona mo lewatleng.” O ne wa re, “Lewatle le rora. Pelo ya motho e palelwa.” Ka nnene. Lefatshe ga le itse se le tshwanetseng go se dira. Bomo ya ntlha ya athomiki e a go bolela. “Go sa tlhomameng ka ga nako, tlalelo fa gare ga ditshaba.” O ne

wa re, "Fa dilo tsena di diragala, fong tsholetsa tlhogo ya gago, Thekololo ya gago e a atamela."

<sup>158</sup> Fa ke akanya ka ga ka kwa, Bajuta bao. Ke bona naledi eo ya kgale ya dintlha tse thataro ya ga Dafita, folaga e kgologolo go feta mo lefatsheng, e kaletse ka kwa. Goreng ditshaba di sa kgone go e bona? Mme go akanya, gore setshaba se e leng sa rona se se rategang se ile go gokagana le Maarabea, go lebega jalo. Ba tlaa hutseg, fela jaaka go tlhomame. Ba tswitlike bo—boutlwelo botlhoko jwa Modimo, jaanong ba tshwanetse ba emele katlholo. Go bona folaga eo ya kgale e kaletse ka kwa! Go bona sekaka se tlhagelela jaaka rosa e tswa dithunya! Go bona Bajuta bao ba boa go tswa kgakala kgakala ko Irane, ba nnile ba le koo dingwaga di le makgolo a le masome a mabedi le botlhano! Baebele ne ya re ba tlaa busetswa morago ko Jerusalema mo diphukeng tsa ntsu. Go bona United Airlines e tona eo e ba busa mo diphukeng tsa ntsu, jaaka go ne go ntse. Bone ba tloga mo dikepeng, ebile ba lebile, mme ba re, "Mesia o kae?"

<sup>159</sup> O ne wa re, "Fa setlhare sa mofeige se ntsha matlhogela a sone, itse gore selemo se gaufi." Re bona gore yone e tlhoga matlhogela. Mme re bona ditlhare tsotlhе tse dingwe di tlhoga matlhogela. Re a itse gore go gaufi. Re bona Ishemaele le Isaka, ka kwa ko kgorong, ba tshwarane ka dithamo, fela jaaka O buile. Seporofeto sengwe le sengwe gone jaanong se a itaya. Modimo, nna le boutlwelo botlhoko mme o boloke ba ba timetseng.

<sup>160</sup> Fa go tshwanetse go nne le mongwe fano bosigong jono, Morena, Yo o Go tlhokang, bua le pelo ya monna kgotsa ya mosadi fela jaanong, gonne go ka nna ga bo e le gore ke oura e e lefifi go feta thata. Le fa re ka nna ra se go lemoge. Go ka tswa go na le bangwe fano ba ba sa lemogeng gore ena ke oura e e lefifi go feta thata, fela ke yone. Satane a ka tswa a ba dirile gore ba ikgotsofatse thata mo dilong tsa lefatshe, go fitlhela ba sa go lemoge.

<sup>161</sup> O ne wa re, mo Baebeleng, "Ga lo a ikatega, lo serorobe, lo tlhomola pelo, lo foufetse, mme ga lo go itse."

<sup>162</sup> Modimo, dumelela, bosigong jono, gore banna le basadi, basimane le basetsana, ba tle ba itharabologelwe mme ba lemoge gore ena ke oura e e lefifi go feta thata e lefatshe le kileng la e bona. Jaanong go dumelele, Morena, gore fa go na le ope fano yo o sa Go itseng, gore ba tlaa tla ka botshe le boingotlo mo sefapaanong, bosigong jono, mme ba amoge Keresete e le Mmoloki wa sebelebele sa bone.

<sup>163</sup> A go na le maitsholo a a kalo, ka ditlhogo tsa rona di obilwe, gore o tlaa rata go gopolwa mo thapelong jaaka re tswala tirelo? A o tlaa tsholeletsa seatla sa gago ko go Modimo, mme o re, "Nkgopole."

<sup>164</sup> Modimo a go segofatse. Modimo a go segofatse. Modimo a go segofatse, le wena, le wena, le wena. Modimo a go segofatse

fa morago foo. Le wena, mohumagadi, ee. A go tlaa nna le yo mongwe fela pele ga ke tswala? Modimo a go segofatse, mohumagadi yo monnye.

<sup>165</sup> Wa re, “Mokaulengwe Branham, a moo go raya sengwe fa ke tsholetsa seatla sa me?” Go ikaega fela mo go se o neng o se kaya.

<sup>166</sup> A lo a itse, fa o tsholetsa seatla sa gago, o nyatsa molao mongwe le mongwe wa maranyane? A o a itse gore seatla sa gago se tshwanetse se lepelele faatshe, maatlakgogo a se kganelele ntlheng ya mmu? O a itse, fa o tsholetsa seatla sa gago, gore go supegetsa gore go na le sengwe sa bofetalholego, mo go wena, se se dirileng tshwetso? Sengwe se e seng sa tlholego. Sengwe se e seng sa boranyane. Ke mowa o o leng ka mo go wena, o go dirile o senye maatlakgogo, ka Setschedi sa bofetalholego mo go wena, o tsholetsa seatla sa gago ko go Modimo wa Legodimo, mme o re, “Nna jaanong ke amogela Jesu e le Mmoloki wa me.” A o a itse gore ke mowa mo go wena o dira seo? O ka se kgone go go dira ka bowena. Seo ke se go se rayang, pharologanyo magareng ga Botshelo le loso.

<sup>167</sup> Fa o le phoso, tsholetsa seatla sa gago ko go Ena. Fa A bona tswere, O a go bona. Go tlhomame.

<sup>168</sup> Jaanong, fa o santse o le gone mo setulong sa gago. Fa o batla go tla mo aletareng mme o rapele, moo go tswa mo go wena. Fa o batla go sala mo setulong sa gago, re ile go go rapelela. O ka dira maikgethelo a gago a tsela e wena o batlang go rapela ka yone. Modimo o tlaa utlwa. Go na le diatla di ka nna mmalwa tse di tsholeditsweng.

<sup>169</sup> Jaanong, fa o eletsa, mme o batla gore Modimo a go direle, gone kwa Ena a go neetseng tumelo gone, gone mo lefelong lone leo, Ena o tlaa tlosa tumelo mo go wena. O tlaa tseela katlholo ya gago mo go Ene ka sebele. Mme Ena o setse a e duetse.

<sup>170</sup> Mme Ena o tlaa re, “Rara, tsenya sekoloto sotlhe sa gagwe mo go sa Me. Go rarabolotswe.” Modimo ka nako eo o tlaa go naya Mowa o o Boitshepo, gone fa o leng teng.

<sup>171</sup> A wena ka nnete o ne o go ikaletse fa o ne o tsholetsa seatla sa gago? Fa o dirile, jaanong a re rapeleng.

<sup>172</sup> Mmoloki yo o sego, ga ke itse fela gore ke bosigo bofe jo e ileng go nna thero ya me ya bofelo. Ke batla go rera nngwe le nngwe fela jaaka yone e ne e le ya me ya bofelo. Gonnie ga ke itse gore ke leng mo O ileng go re, “Gotlhe go wetse jaanong. Tlaya Gae.” Ke rapela gore O mopoloke. Ke batla go nna, go rera Lefoko. Ke bona letlhoko la Efangedi, le ditlamorago tse E nang natso mo sikeng loo motho. Fela fano mo lefatsheng le e leng la rona le lentle la Amerika, re bone boiketlo jo bontsi thata, dikhumo, tshetelete, sengwe le sengwe.

<sup>173</sup> Ao, rona fela re ka se kgone go tswelela jaana, mme bontsi jwa lefatshes bo bolawa ke tlala. Re ile ra jesiwa sentle le go apara,

mme re na le magae a rona, dikoloi tsa rona. Ga re na letlhoko la sepe, mme ga re itse gore rona re “tlhomola pelo, re serorobe, re foufetse,” go bua ka semowa, “re sa ikatega,” ntleng ga Madi a Morena Jesu. Le fa, re ka nna ra bo re na le boloko jo bogolo mo kerekeng. Re ka nna ra bo re na le maemo a matona a morafe mo tikologong. Re ka nna ra apara mo go botoka, ra ja mo go botoka. Fela, Ao tlhe Modimo, ka ga mowa oo wa botho!

<sup>174</sup> Jaanong, mo oureng ena e e lefifi, O santse o le fano, ka gore O bayo tumelo mo dipelong. Go nnile go na le diatla di le mokawana, ke a fopholetsa, di le lesome le bobedi; nka nna ka bo ke le phoso. Di ka nna tsa bo di ne di le tse di fetang kgotsa tse di ko tlase ka palo. Ga ke itse, Morena, fela Wena o itse mongwe le mongwe wa bone.

<sup>175</sup> Mme jaanong, ka masisi, mo thapelong ya go tswala, ke ba tlisa ka botshe le boingotlo mo dinaong tsa Gago, e le dikao tsa theroy a me bosigong jono, e le leungo la Molaetsa. Ke ba tlisa ko go Wena, Morena, jaaka ba tsholetsa seatla sa bone gore nna ke ba gakologelwe mo thapelong. Mme bona ba khubame jaanong mo pelong ya bone, kwa sefapaanong. Ba amoge, Rara. Ba tseye jaaka bana ba Gago ba ba rategang. Mme le fa e ka nna kae kwa ba yang kerekeng gone, le fa e ka nna kae kwa go ka bong go le gone, ao, mma ba nne batlhabani ba thapelo. Mma ba nne bathopi ba mewa ya botho; tiro, gonne bosigo bo etla. Go dumelele, Rara. Ba tseele ka mo tlhokomelong ya Gago, mme o ba segofatse o bo o ba neele keletso e kgolo ya pelo ya bone. Mme mma Mowa o o Boitshepo o o segofetseng o tlatse botshelo jwa bone. Gonne re go kopa ka Leina la Keresete. Amen.

<sup>176</sup> Ke ba le kae ba ba ratang Morena Jesu ka pelo ya bone yotlhe? Ao, a Ena ga a gakgamatse? Ke ba le kae ba ba ikutlwang fela ba ntlafaditswe gotlhe? Fela jaaka okare Morena o ne a fetsa go fologa mme a tsaya boratšhe jo bogolo jwa Gagwe jo bo gobang mme a go gobela fela kgakala. Ijoo!

<sup>177</sup> Re neye dinoto tsa pina eo ya kgale, ke a dumela, pina ya Salvation Army, “Ke eng se se ka tlhatswetsang kgakala boleo jotlhe? Ga go sepe fa e se ma . . .” [Phuthego ya re, “Madi a ga Jesu.”—Mor.] “Ke eng se se ka mphodisang gape? Ga go sepe fa e se ma . . .” [“Madi a ga Jesu.”] Go ntse jalo. A re e opeleng, rotlhe ga mmogo, jaanong.

Ke eng se se ka tlhatswetsang kgakala boleo  
jwa rona?

Ga go sepe fa e se Madi a Jesu;  
Ke eng se se ka mphodisang gape?  
Ga go sepe fa e se Madi a Jesu.

Ao, e botlhokwa kelelo,  
E e ntshweufatsang jaaka sefokabolea;  
Ga go motswedi o mongwe o ke o itseng,  
Ga go sepe fa e se Madi a Jesu.

<sup>178</sup> A moo ga go go ntle? Lo rata difela tseo tsa kgale? Ijoo! Ke ne ke batla go bona sengwe jaanong. Ke ofeng wa lona... Mamethodisti otlhe tsholetsang seatla sa lona. Go siame. Mabaptisti otlhe tsholetsang seatla sa lona. A go na le Pilgrim Holiness? Tsholetsa seatla sa gago. Monasarine? Tsholetsa seatla sa gago. Church of God? Tsholetsa seatla sa gago. Presbitheriene? Tsholetsa seatla sa gago. A go tlaa nna le Mokhatholike? Tsholetsa seatla sa gago. Leba fela ko dikerekeng tse di farologaneng teng fano!

<sup>179</sup> Jaanong fa re santse re opela eo gape, ke eng se se dirang gore Mopresbitheriene a fole? Ga go sepe fa e se Madi a ga Jesu. Ke eng se se dirang gore Momethodisti a fole? Ga go sepe fa e se Madi a ga Jesu. Ke eng se se dirang gore Monasarine a fole? Ga go sepe fa e se Madi a ga Jesu.

<sup>180</sup> Ke eng se se dirang...? Ke Mapentekoste a le kae? Ke lebetse go botsa seo. Ke Mapentekoste a le kae teng fano? Tsholetsang seatla sa lona. Jaanong batho bonang. Ba re rona re kereke ya Pentekoste. Go ne go na le diatla di le tlhano tse di neng tsa tlhatloga, tsa Mapentekoste. Ke lona bao.

<sup>181</sup> Ga re Mapentekoste, ka lekoko. Re Kereke ya Modimo yo o tshelang. Re bana fela ba Modimo. Re Mapresbitheriene. Re Mamethodisti. Re Mabaptisti. Re Malutere. Re Manasarene. Re Mapentekoste. Re Pilgrim Holiness. Re botlhe ba bone. Gonno rotlhe re bangwefela, mo go Keresete Jesu. Ke eng se se go dirileng? Sena!

Ke eng se se ka tlhatswetsang boleo jwa me  
kgakala?  
Ga go sepe fa e se Madi a Jesu;  
Ao, ke eng se se ka mphodisang gape?  
Ga go sepe fa e se Madi a Jesu.

Ao, e botlhokwa kelelo,  
E e ntshweufatsang jaaka sefokabolea;  
Ga go motswedi o mongwe o ke o itseng,  
Ga go sepe fa e se Madi a Jesu.

<sup>182</sup> A Ena ga a gakgamatse? Ee, rra! Jaanong fa re santse re opela, *Golo Kwa Sefapaanong*, ke batla Momethodisti, le Mobaptisti, le Mopresbitheriene, le Mopentekoste, le Monasarene, botlhe go dumedisana ka diatla, go siame, fa re santse re e opela.

Golo kwa sefapaanong kwa...

Retologang gone jaanong, neelana diatla le mongwe.

Golo kwa ntlatfatsong...

Koo mo pelong ya me Madi a ne a dirisiwa;

Kgalalelo go Leineng la Gagwe! (. . .? . . .)  
 Kgalalelo go Leina la Gagwe le le rategang  
 thata!

Koo mo pelong ya me Madi a ne a dirisiwa;  
 Kgalalelo go Leina la Gagwe le le rategang  
 thata!

<sup>183</sup> Jaanong jona ke bosigo jwa selalelo, jaaka mongwe le mongwe a itse. Re ja selalelo bosigong jono. Mme ke ne ke lebetse ka ga gone go fitlhela Mokaulengwe Neville a ne fela a nkgakolola.

<sup>184</sup> Jaanong ke ba le kae ba ba ikutlwang motlotlo ka nneta, gore wena o Monasarine Pilgrim Holiness Mobaptisti wa Mopentekoste? A re boneng seatla sa lona. Ke ne ke lemoga fano, Mobaptisti le Momethodisti ba eme mo seraleng, ba dumedisana ka diatla. Ao, a ga re . . . A ga go go ntentle go nna motlhanka wa Morena!

<sup>185</sup> Jaanong re bana fela. Mme bana ba na le ditsela tse di tshegisang mo go boitshegang, lo a itse. Ba tlaa bo ba tlhatlharuana motsotsa o le mongwe mme ba tshameka mo go latelang. Mme eo ke tsela e re tshwanetseng go nna ka yone. Tlosa fela tlhatlharuane, mo legetleng la gago, mme lo tswelele ntle lo bo lo nna le monate o montsi, lo tshameke ka dimpopi tsa lona, le eng le eng se se tshwanetsweng go dirwa.

<sup>186</sup> Jaanong re na le tsosoloso e e tlang. Mme re ile go opela Efangedi, re rere Efangedi, mme re nne fela le nako e ntla thata. Ke ba le kae ba ba ileng go e rapelela? [Phuthego ya re, "Amen."—Mor.] Ao, moo go molemo. Jaanong, tlaya mme o re thus. Tsena mo mogaleng. Tsena ka tsela nngwe le nngwe e o ka kgonang, laletsa bana botlhe mo teng. Ba bolelele, "Tlaya ka kwano jaanong, mme o re thus jaanong. Re ile go nna le kabalano nngwe tikologong ya Lefoko."

<sup>187</sup> Jaanong ke nako ya selalelo. Mongwe le mongwe o amogelesegile go ja selalelo le rona, metsotsa e le mmalwa fela. Ba di tlisa golo fano fa aletareng, mme, metsotsa e le lesome kgotsa lesome le botlhano, gotlhe go fedile, re tlogre re obamele tlhapiso ya dinao.

<sup>188</sup> Mokaulengwe Neville jaanong o tlaa bala Lekwalo mabapi le selalelo, fa re santse re nna masisi tota jaanong, jaaka re ja selalelo.



*FONG JESU A TLA* TSW57-0407E  
(Then Jesus Came)

Molaêtsa o ka Mokaulengwe William Marrion Branham, o nê wa rérwa la ntlha ka Sekgowa mo maitseboeng a Letsatsi la Tshipi, Moranang 7, 1957, kwa Motlaaganeng wa Branaham ko Jeffersonville, Indiana, U.S.A., o tsêrwe mô theiping ya makenete mme wa gatisiwa ka Sekgowa o sa khutswafadiwa. Phuthololô e ya Setswana e gatisitswê le go abiwa ke ba ga Voice Of God Recordings.

TSWANA

©2023 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kitsisô ka tetlokhopi

Ditshiamelo tsotlhe di sireleditswe. Buka e e ka gatisiwa fa motšhineng wa go gatisa wa ka fa lelapêng gore e dirisiwe ka namana kgotsa gore e abêlanwe, go se tuêdisô epê, e le sedirisiwa sa go gasa Efangele ya Jesu Keresete. Buka e ga e ka ke e rekisiwe, e boelediwe ka bontsi, e baiwe fa webosaeteng, e bolokiwe mo mofuteng oo e ka tlhagisiwang gape ka one, e fetolêlwé go maleme a mangwe kgotsa e dirisiwe go kgobokanya madi kwa ntle ga tetla e e kwadilweng ya Voice Of God Recordings®.

Go ka bolêlêlwá go feta fa kgotsa go ka itse ka dilo tse dingwe tse di leng têng, tswêêtswêê, ikamanye le ba ga:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)